

Islam tegah sertai demonstrasi

Konsep syura saluran terbaik selesaikan isu demi kepentingan ummah

Oleh Azman Mahmood
azmanm@bharian.com.my

KUALA TERENGGANU: Pembabitan umat Islam dalam perhimpunan haram atau sebarang perhimpunan yang boleh memudaratkan keselamatan rakyat, negara, merosakkan harta benda dan seumpamanya, adalah ditegah Islam.

Sehubungan itu, Pengerusi Jawatankuasa Fatwa Majlis Kebangsaan Bagi Hal-Ehwal Agama Islam, Profesor Emeritus Tan Sri Dr Abdul Shukor Husin, berkata perbuatan dan tindakan yang boleh membawa kepada merosakkan kebaikan sedia ada, adalah satu dosa besar dalam Islam dan menyertai perhimpunan haram jelas tidak membawa kebaikan, melainkan menimbulkan masalah kepada pelbagai pihak.



Perbuatan dan tindakan yang boleh membawa kepada merosakkan kebaikan sedia ada adalah satu dosa besar dalam Islam dan menyertai perhimpunan haram jelas tidak membawa kebaikan, melainkan menimbulkan masalah kepada pelbagai pihak



Dr Abdul Shukor Husin
Pengerusi Jawatankuasa Fatwa Majlis
Kebangsaan Bagi Hal Ehwal Agama Islam

“Perhimpunan ini (BERSIH) bukan soal fatwa... sekarang ia jelas membuat perkara merosakkan atau tidak mendatangkan manfaat, ia dilarang Islam dan saya fikir ini satu perkara tidak harus dilakukan.

“Jadi, saya menasihatkan umat Islam khususnya dan bukan Islam supaya menjaga keamanan yang kita nikmati hari ini, sekali gus menjadi negara contoh oleh dunia luar,” katanya selepas majlis Wacana Pendidikan Fatwa Negeri Terengganu 2011 anjuran Jabatan Mufti Terengganu dan Jabatan Kemajuan Islam Malaysia (JAKIM) yang dirasmikan Menteri Besar, Datuk Seri Ahmad Said, di sini, semalam.

Beliau berkata demikian ketika diminta mengulas pandangan Islam berhubung perhimpunan haram BERSIH yang mahu menga-

dakan perhimpunan 9 Julai ini.

Bagaimanapun, Dr Abdul Shukor mengaku, Islam tidak menghalang perbezaan pendapat dan membenarkan memberi pandangan, tetapi perlu mengikut saluran yang betul kerana Islam amat mementingkan konsep ‘syura’ sebagai saluran perbincangan dalam mencari sesuatu jalan penyelesaian.

“Soalnya, apakah yang sudah ada dan berjalan dengan baik (kerajaan sekarang) kita perlu runtuhkan dan nak bina yang baru pula dan dikatakan satu tamadun... tidak, sebaliknya kita (rakyat) kena pertingkatkan lagi dan sokong supaya menjadi lebih baik.

“Secara peribadi, tak perlu fatwa kerana sudah jelas Islam melarang kita terbabit dengan perkara tidak mendatangkan kebaikan,” katanya.